

AgroFest Sarawak 2018 sarat dengan program pendidikan dan hiburan

- 2018-10-16T16:16:23+08:00



Sagah (tiga kiri) pada sidang media mengenai Agrofest Sarawak 2018 di sebuah hotel di sini hari ini. Turut kelihatan (dari kiri) Lelia, Gluma, Ik Pahon, Chai dan Sajem.

KUCHING: Agrofest Sarawak 2018, festival pertanian utama di Sarawak kembali lagi dan kali ini ia menggabungkan elemen pendidikan serta hiburan.

Bermula pada 20 hingga 28 Oktober 2018, di Pusat Konvensyen Penview (PCC), Demak di sini, festival yang dahulunya dikenali Hari Peladang, Penternak dan Nelayan (HPPN) menggabungkan pameran dan jualan, persidangan dan seminar, pemadanan perniagaan, jualan makanan, mini zoo, permainan, peraduan dan hiburan.

Timbalan Ketua Menteri Datuk Amar Douglas Uggah Embas berkata Agrofest Sarawak dianjurkan setiap tahun bermula dari HPPN untuk mempromosikan secara aktif industri pertanian dan asas tani di negeri ini.

"Objektif-objektif khusus Agrofest Sarawak ialah mempromosikan keluaran pertanian dan produk asas tani Sarawak serta pertanian pintar, moden dan komersial.

"Ia juga mempromosikan peluang-peluang perniagaan dan pelaburan dalam pertanian serta penglibatan belia dalam sektor ini," katanya dalam teks yang dibacakan Menteri Muda Pembangunan Tanah Adat Datuk Ronald Sagah Wee Inn pada sidang media di sini hari ini.

Beliau berkata Agrofest Sarawak akan menjadi acara tahunan dalam kalender acara Negeri, menggabungkan program-program pendidikan serta hiburan dan pertandingan yang menawarkan hadiah menarik kepada pengunjung bertuah.

"Komponen utama festival selama sembilan hari ini ialah penganjuran edisi kedua Persidangan Pertanian dan Industri Asas Tani Sarawak (ICCAS).

"Objektif utama ICAAS 2018 ialah berkongsi kisah kejayaan dalam pertanian pintar dan moden, mengenal pasti amalan dan model terbaik untuk usaha sama antara sektor awam dan swasta dalam mengkomersilkan pertama pada masa sama mempromosikan kejayaan perusahaan pertanian berasaskan komuniti," jelasnya.

Ketua Menteri Datuk Patinggi Abang Johari Tun Openg dijadual merasmikan Agrofest Sarawak 2018 pada 25 Oktober ini pada pukul 10 pagi.

Hadir sama, Setiausaha Tetap Kementerian Pemodenan Pertanian, Tanah Adat dan Pembangunan Wilayah Datu Ik Pahon Joyik, Ketua Bahagian Mengkomersilkan Pertanian MANRED Dr. Gluma Saban, Pemangku Pengarah Jabatan Pertanian Sarawak Dr Alvin Chai Lian Kuet, Pemangku Timbalan Pengarah Jabatan Perkhidmatan Veterinar Sarawak Dr Sajem Jinim dan Ketua Pegawai Eksekutif Institut Pembangunan Sarawak Lelia Sim Ah Hua.

- oleh Patricia Gari